



# **PARTORDING NI ACARA PESTA NATAL PADUAHON**

📖 Ev: Psalmen 98 : 1 - 9

📖 Ep: Titus 3 : 4 - 7

**TOPIK:**

**NUNGA DIPABOTOHON JAHOWA HALUAON TU HITTA**

**Kamis, 26 Desember 2024**

**1. Joujou tu Parsombaon tu Debata:**

U: Huria ni Tuhanta, sadari on, i ma pesta paduahon mamestahon Parningotan Hatutubu ni Tuhanta Jesus Kristus, alani hupasahat hami ma tu hita saluhutna : “Selamat Hari Natal”.

**H: Selamat Hari Natal.**

U: Marpungu do hita nuaeng manghamauliatehon balga ni holong ni Debata tu portibi on umbahen ditongos AnakNa na sasada i na paluahon hita.

**H: Mandok mauliate do hami tu Debata, ala ni godang ni asi ni rohaNa di hami; ai dibasabasahon AnakNa na sasada i tu hami na di pardangolan on, asa unang mago, alai asa dapotan hangoluan na salelenglelengna di Ibana.**

U: Antong tapahibul ma rohanta manjangkon Ibana tubu di rohanta nang di parsauranta marhite parmingguonta di ombas on. Tapungka ma parsombaonta tu Tuhanta, marende ma hita :

**2. Marende BE. HKBP No. 56 : 1 - 3 “SAI RO MA HAMUNA”**

♪♪♪ Sai ro ma hamuna angka na porsea.; Sai ro ma hamuna tu Betlehem.

I da dakdanak, sipalua hita. Tasomba ma Ibana

Tasomba ma Ibana, tasomba ma Ibana, Rajanta.

♪♪♪ O Raja na sangap, Tuhan ni saluhut.;Ditaon Ho na porsuk di tano on.

Ala ni jolma na di hamagoan. Tasomba ma Ibana.

Tasomba ma Ibana, tasomba ma Ibana, Rajanta.

.....Musik (Jongjong).....

♪♪♪ Hamuna suruan, puji ma Jahowa.; Rap dohot sude na martua i.

Sangap di Tuhan Debata di surgo, Tasomba ma Ibana,

Tasomba ma Ibana, tasomba ma Ibana, Rajanta.

### 3. Votum – Introitus :

U: Marhitehite Goar ni Debata Ama dohot Goar ni Anakna Tuhan Yesus Kristus dohot Goar i Tondi Parbadia. Amen. Nunga patar hangoluan i, jala nunga huida hami jala nunga huhatindanghon hami dohot hubaritahon hami tu hamu hangoluan na saleleng ni lelengna, na di lambung ni Ama i hian jala naung patar di hami. **Haleluya!**

**H: (Mangendehon) Haleluya....Haleluya.....Haleluya...**

U: **Martangiang ma hita:** Ale Debata, Ama na di banua ginjang! Pujipujian, hasangapon dohot hamauliateon husombahon hami tu Ho, marningot silehonlehonMi na balga i tu hami jolma na di pardangolan on, i ma AnakMu, Yesus Kristus, na sinuruMi sian banua ginjang ala ni hami. Gabe na dangol do Ibana jala na pogos, pola tubu Ibana di bara ni Betlehem, asa mamora hami. Sai rajai jala togutogu hami marhitehite TondiM, asa lam huida hami godang ni holong ni rohaM na pinapatar ni AnakMi. Amen. **(Hundul)**

### 4. Marende BE. HKBP No. 597b : 1 “BARITAHON DI DOLOK” BL. 597b

♫♫♫ Baritahon di dolok di rura di sude inganan,  
Baritahon di dolok naung tubu Kristus i.  
Ro do surusuruan tu ladang Efrata  
Mandapothon parmahan tompu mansai torang.  
Baritahon di dolok di rura di sude inganan,  
Baritahon di dolok naung tubu Kristus i.

### 5. Patik :

U : Tangihon hamu (Tatangihon) ma Patik ni Debata di Minggu sadari on i ma **1 Kronika 16 : 23 - 24**, “Endehon ma Jahowa, ale sandok tano on, baritahon hamu ma hatuaonNa ganup ari. Pajojor hamu ma di tongatonga ni halak parbegu hamuliaonNa i, di tongatonga ni saluhut bangso halongangan angka na binahenNa i.”.

*I do sahatna. Antong, rap mangido gogo ma hita sian Tuhan Debata!*

**U+H : Ale Tuhan Debata sai pargogoi ma hami mangulahon na hombar tu PatikMi. Amen.**

### 6. Marende BE. HKBP No. 600 : 3 - 4 “DI BORNGIN NA SASADA I”

♫♫♫ Sai dipatunduk dosa i huhut tinompaMi.  
Sai naeng disoadahon do barita dame i,  
Antong hamu pardosa i pauba rohami  
Tangihon ni endehon ni suru-suruan i

**(Jongjong)**

♫♫♫ Hamu angka na loja i jala na sorat i,  
Binaen ni angka dosami dapothon Tuhan i.  
Tingganghon hinolsohonmi tu Sipalua i,  
Auhon ni endehon ni Suru-suruan i.

## 7. MANOPOTI DOSA:

U : Tatopoti ma dosanta. Martangiang ma hita : Ale Amanami jala Debatanami na di banua ginjang. Parasiroha na sumurung mida hami! Huparhatutu jala hutopoti hami do dosa dohot pangalaosionnami na godang i. Tatap hami marhitehite asi ni rohaM, jala sesa ma dosanami saluhutna, ala ni panghophop ni Anak haholongan ni rohaM, Tuhan Jesus Kristus, Sipangolu hami. Amen.

### **Bagabaga ni Debata Taringot tu hasesaan ni dosa:**

Satongkin do Hutadingkon ho, alai papungupunguonHu ma ho muse marhitehite angka asi ni roha godang! Tagan di parpiar ni murukHu Hutabunihon bohingKu satongkin maradophon ho, alai marhitehite dengganbasa salelenglelengna asianHu ho, ninna Jahowa Sipalua ho. Hasangapon ma di Debata na di ginjang!

H : Amen.

(Hundul)

## 8. Marende BE No. 51 : 3 - 4 “TOLE PUJI MA TUHANTA BL. 31

♫♫♫ Sai tandai ma denggan basa ni Jahowa Debatanta.  
Dibasahon do AnakNa baen hangoluanta i.  
♫♫♫ I ma ro holong rohaNa, jolma do dibaen donganNa,  
Dohot tu harajaonNa hita diarahon do.

## 9. Epistel: (Uluan; Ba= Baoa ; Br= Boru-boru ; S=Sude)

U : Tangihon hamu (Tatangihon) ma Hata ni Debata turpuk Epistel di Pesta Natal na Paduahon on, tarsurat di **Titus 3 : 4 - 7**: Alai disi ma tarida habasaon dohot habasaron ni Debata, Sipalua hita:

**Ba: Ndada ala ni ulaonta hatigoran, umbahen na dipalua Ibana hita; tung sian asi ni rohana do, marhitehite pandidion pangulahion tubu dohot marhitehite Tondi Parbadia na paimbaruhon i**

U : Naung niusehonNa i tu hita buas marhitehite Jesus Kristus, Sipalua hita,

**Br: Asa gabe tigor hita, binahen ni asi ni rohaNa, jala sitean hangoluan salelenglelengna, mangihuthon panghirimon i.**

U : *I do sahatna. Martua ma angka na tumangihon Hata ni Debata, jala na umpeopsa.*

S : Amen

**10. Marende BE No: 50: 1 - 2 “MARENDE MA HAMU”**

**BL. 119**

♫♫♫ Marende ma hamu, on ma dohononmu:  
Holong ni rohanta do Posoposo on,  
Na mareakhon hita tu atas tano on;  
Tuhanhi do Ho, Tuhanhi do Ho.

-----Musik----- (Jongjong)

♫♫♫ Malungun au di Ho, o Jesushi naung ro.  
Apul ma rohangku saleleng au dison,  
Asi rohaM di ahu marnida dangolhon  
Taiti au tu Ho, taiti au tu Ho.

**11. Manghatindanghon Haporseaon:**

U : Tahatindanghon ma haporseaonta i, songon na hinatindanghon ni donganta sahaporseaon di sandok portibi on. Rap ma hita mandok:

Sude : Ahu porsea ..... du. Amen ! (Hundul)

**12. K O O R :**

**13. Sunggulsunggul (Boaboa)**

**14. K O O R : Vocal Group Parguru Malua**

**15. Papungu Pelean Huhut Marende BE. HKBP No. 614 : 1 – 4 “RO MA HO TU AU” BL 614**  
**(Pelean Ia & Ib)**

♫♫♫ Ro ma Ho tu au o Jesus Tuhanhi,; Sian banua ginjang tu rohangki.  
Ro ma Ho tu au o Tuhan Sipalua i.  
Dame binoanMu ndang natarasam i, o Tuhanhi.

♫♫♫ Asi ma roham di au o Tuhanhi,; Sai jalo ma tangiang nang endengki.  
Songon si Maria ina na martua i,  
Baen nang au martua ala haroroMi, o Tuhanhi.

-----Musik-----

♫♫♫ Ende ni suruan pardisurgo i,; Binege ni parmahan di ladang i.  
Nunga tubu Raja Kristus Sipalua i  
Di huta Betlehem peak di bara i, o Tuhanhi.

♫♫♫ Nang parhapistaran sian purba i,; Manungkap do marsomba tu Tuhan i.  
Sere dohot na angur ro di haminjon i,  
Dipelehon tu Ho Raja na sorang i, o Tuhanhi.

**16. JAMITA : Psalmen 98 : 1 – 9**

**17. Papungu Pelean Huhut Marende BE. HKBP No. 59 : 1 - 7 “O JESUSHI HUPUJI HO” BL. 34** *(Pelean II)*

♫♫♫ O Jesushi hupuji Ho dibaen naung gabe jolma Ho  
Ditopot Ho do hami on na dangol di portibi on  
♫♫♫ Peak di panggagatan i do Anak ni Jahowa i  
Partohap di sibukta on do na pangolu hita on  
-----Musik-----

♫♫♫ Sigomgom parluhutan i do na peak di bara i  
Porsuk paniahapan ni na marmuduhon hita on.  
♫♫♫ Ibana na tiur hian na sangap sian nahinan  
Do patiurhon tano on lao manondangi hita on

**18. Sakramen Pandidion Nabadia**

**1. Marende BE No. 146: 1-2 “O Jesus Naeng Tardidi”**

O Jesus naeng tardidi, do posoposo on  
Sai ro ma mangaligi, huhut manjalo on.  
Diboan natorasna, nasida be tuson  
Ai naeng pasahatonna, tu Ho dakdanak on

**19. Manghatindanghon Haporsaeon**

**1. Marende BE No. 149: 1 “Ho tongtong Ihuthononhu”**

Ho tongtong ihuthononku Jesus Sipangolu au  
Tung na so tadingkononku, Ho na paluahon au  
Sian sasude dosanku, dohot sian uhum i  
Na tongtong habiaranku, ala pardosaonki.

**2. Marende BE No. 256: 1+4 “Jesus Kristus I do Raja”**

Jesus Kristus i do Raja, pinabangkit ni AmaNa  
Manggomgomi sasude, manggomgomi sasude  
Jala nasa hajolmaon, tu Ibana do mar-Tuhan  
Parhatopotonna be, parhatopotonna be  
Holan Jesus patupahon, na malua hajolmaon  
Ala ni mudarNa i, ala ni mudarNa i  
Nunga sahat hangoluan, sai tongtong do partuaon  
Dibagasan Jesus i, dibagasan Jesus i

## 20. Panutup : (Jongjong)

U : Huria ni Tuhanta, nuaeng rap do hita manghalashon hatutubu ni Tuhan Jesus Kristus i. Nunga dipabotohon Jahowa hatuaonNa i jala nunga dipapatar Ibana hatigoranNa i.

H : **Nunga diingot Ibana asi ni rohaNa dohot hasintonganNa tu hita marhitehite Jesus Kristus, Sipalua hita, asa gabe tigor hita, binahen ni asi ni rohaNa, jala sitean hangoluan salelenglelengna, mangihuthon panghirimon i.**

U : Antong marsuraksurak ma ho, ale sandok tano on, mangolophon Jahowa, pangiar ma soaram marolopolop, jala marende ma hamu.

H : **(Mangendehon) BE. HKBP No. 605: 1 “LAS MA ROHAM”**

♫ Las ma roham Tuhanta ro, gumomgom sasude.

Ungkap roham, jangkong Rajam, marende ma sude,

Marende ma sude, marende, marende ma sude.

## 19. Tangiang Pangujung: Pelean – Tangiang Ale Amanami - Tangiang Pasupas:

U : Tatangianghon ma peleanta. Ale Debata, Amanami na di banua ginjang! Ho do haroroan ni saluhut silehonlehon na denggan dohot nasa ulibasa na mauiutus. Hupasahat hami ma sian na nilehonMi tu hami, peleannami tu Ho. Sai jalo ma i gabe uap na hushus di joloM. Pasupas ma i jala ramoti asa huparhaseang hami pelean on, patimbulhon HarajaonMu di tongatonga ni HuriaM dohot di portibi on. Buhai ma rohanami marhitehite TondiM, asa lam hutanda hami godang ni silehonlehonMi tu hami, asa lam girgir hami mandok mauiate tu Ho, marhitehite Jesus Kristus Tuhannami. **Amen.**

H : **(Mangendehon) BE. HKBP No. 204 : 2 “NDANG TADINGHONONHU HO” BL. 73**

♫ Nasa na nilehonMi, tondi ro di pamatanghu

Hosa dohot gogongki, ro di saluhut artangku

Hupasahat i tu Ho, na so unsatonhu do.

U : Ale Amanami na di banua ginjang! Sai pinarbadia ma GoarMu! Sai ro ma harajaonMu! Sai saut ma lomo ni rohaM di banua tonga on songon na di banua ginjang! Lehon ma tu hami sadari on hangoluan siapari! Sesa ma dosanami songon panesanami di dosa ni dongan na mardosa tu

hami! Unang hami togihon tu pangunjunan! Palua ma hami sian pangago!

**H : (Mangendehon): BE. HKBP No. 841 : 1 “AI HO DO NAMPUNA HARAJAON” BL. 841**

♪♪♪ *Ai Ho do nampuna harajaon, dohot hagagoon  
Ro di hasangapon, saleleng ni lelengna, Amen*

U : Tangiang Pasupasu.

**H : (Mangendehon ) BE. No. 845 : 1 “AMEN (3X) HKBP” BL. 845.**

♪♪♪ *Amen, Amen, Amen.*